



許敬宗集

賦

麥秋賦應制

臣聞五土異宜四氣分序考宿麥於生類起
嚴秋於溽暑翫漸秀於梅風潤岐苗於穀雨
于時陽翹總暢陰呂潛生當隆曦之首節韞
秋令之初萌雜芸黃於綠野叅肅殺於朱明
始自天而下降終因地而斯成疇中氣爽壟
際風清引神飈於綺殿指明月於紈扇砌積



玉兮疑冰庭飛花兮似霰矯微陽於修景溽
寒露於芳甸棟刻桂兮含井雕蓮兮發絢
雲標峯而勢詭氣澄商而節變若乃葉幄垂
秀條帷汎光鶯傳枝而裊娜蜂散藥而芬芳
對銀而偶穗並金縷而分芒如炎炎之鑠
石若慄慄之霜資高明以納豫順冲和以
自芳非甘泉而滌景異寒氣而浮涼却冰純
於寶笥屏珍簾於披香命載筆於蓬渚贊天
文於栢梁幸千齡兮此遇奉萬壽兮稱觴

掖庭山賦應詔

覽先哲之英華遊舊典之場圃善逾遠而斯
應德既昭而必輔見漢屏於睢陽驗周藩於
有魯表商丘而作鎮規楚室而興宇亦何代
其無人諒吾王之邁古於是命世作弼含章
挺生允文允武惟誠惟明聽甘棠之暇隙想
叢桂之幽情瞰浮雲而志遠坐寒井而神清
乃命僕夫整駕山隅騰鳴笳於通谷擁飛蓋
於高衢逍遙仁智之境放曠道德之區造中

天而式宴陵倒景而爲娛星懸珠網日對金
鋪雲承綺棟霓縈繡櫺旣而近矚玲瓏遠眺
溟濛隔翠微而半顯歷丹穴而纔通等玉京
之仙化侔銀關之神功于時百卉敷榮六合
清朗霞淡水而川媚風飄林而澗響聳絕壁
之千尋掛懸流之萬丈蔽日月而孤峙吐雲
霓而秀上循折坂而遭迴躡危嶠而來往鑿
離暉於石鏡滋瑞露於雲掌爾其花藥芬披
蹊徑參差舒英冒渚擢幹臨崖乍莽蒼而橫

植忽葑茸而倒垂扇晨飈而裊裊含宿霧而
猗猗蔭町疇之毛群哢間關之羽族或相賀
於薨棟或競馳於原陸駒食藿而馴場鶯含
桃而出谷德澤加於飛走榮光周於草木日
云暮時稍闌暢宸襟而體物紀盛跡以濡翰
發詞林之筆藻瀉筆海之波瀾命小臣而並
作賦大雅而承歡辭曰芳園兮鬱鬱高岫兮
峨峨君王兮遊豫軒蓋兮經過花同林兮異
彩鳥各轉兮相和野獸鳴兮應鍾石山英開

兮間綺羅侍荆臺之入夢舞洛汭之凌波懸
清暉於日月同眉壽於山河

小池賦應詔

臣忝班下列胥宇上京欣託巢之有庇體堦
戶之全生爰鑿小池依于勝地引八川之餘
滴通三涇之洋溢慕鑿止而端形乃遊智而
清志爾其潺湲繞砌澗淡縈除擬高陽而不
足比蹄涔而有餘游瑩劍之微鳥躍靈鼎之
纖魚若乃倚井傍通桃蹊俯映仰天津兮共

澹潔秋景兮俱淨倒列宿以疑珠含望舒而
似鏡覩江使之潛處翫波臣之沉泳於是翻
光甕牖漾影蓬門溜激石兮長嘯鳧鼓浪兮
相喧竹凝露而全弱荷因風而半翻足以澡
瑩心神澄清耳目對昆明而取喻况春蘭與
秋菊不羨寶於何宗豈希大於賜谷彼瑤池
之高讌固幽遠而空傳此坳堂之信遠遂騰
譽而聞天降臨渦之睿藻連橫汾之曩篇何
微生之一日荷太賚於千年

欽器賦

臣聞人靈貴損天道忌盈朱火終而火景謝
金波滿而哉魄生察逝來於四序揆迭運於
三精淺知昧於成象通識鮮於未萌務循虛
而守約處崇高而慎傾爰製有卮勗茲居位
葺丹楹之峻宇偶清廟之彛器體虛舟之瀆
空鑿樸滿之延崇彼游鱗之盤樂咸見亡於
芑餌此貪夫之死權誠 駕於明利唯達人
兮服道執溫恭兮靜志居泰山以思危騁高

衢而不躓在大明之玄鑿猶垂旒以蔽聰履
克讓之貞吉尚養正以希蒙矧群材之小器
忘戒溢而虧冲悟負乘之必蹶敬循崖而飭
躬由是鳴謙君子卑以自牧如彼景山猶葺
疾於林麓譬諸巨海亦素王於百谷庶辭滿
而常正固懷空而靡覆若乃求中軌範流慶
資源峰潤由於韜玉葉茂本於身根草卷施
而不死木交讓以俱存梅飛英而劔笑桃絢
彩而無言燕迎秋兮遁跡鸞移春兮息喧皆

順序而行止得妙之玄門道雅合於斯器故
保精而養魂

竹賦

惟修竹之勁節偉聖賢之留賞覽山經而逖
聽詠周詩而遐想掩寰中而獨秀非庶物之
所仰若夫嶰谷著美稽山見知衛國之稱淇
澳梁園之賦夾池山陽之翻密葉江潭之竦
喬枝雖有聞於在昔諫無得而標奇乃徒植
於廣庭爰移根於禁苑巨萱草而東列遶醴

泉而右轉修幹橫於松徑低枝拂於蘭畹對
紫殿之初旭臨丹樓而向晚望威鳳而來儀
佇化龍之爲遠爾乃春光變色夏景開叢枝
藏戲鳥葉間殘虹上便娟而防露下檀欒而
來風散歸雲之掩翳引落日之玲瓏雖復嚴
霜曉結驚飈夕扇雪覆層臺寒生複殿惟貞
心與勁節隨春冬而不變考衆卉而爲言最
高於歷選

五言雜詩

安德山池宴集

戚里歡娛地園林矚望新山庭帶芳杜歌吹
叶陽春臺榭疑巫峽荷蕖似洛濱風花縈少
女虹梁聚美人宴遊窮至樂談笑畢良晨獨
歎高陽晚歸路不知津

奉和執契靜三邊應詔

玄塞隔陰戎朱光分昧谷地遊窮北際雲崖
盡西陸星次絕軒臺風衢乖禹服寰區無所
外天覆今咸育竄苗猶有孽戮負自貽辜踈

網妖覲漏盤數恠禽逋髯飛尚假息乳視慙
稽誅乾靈振玉弩神略運璇樞日羽廓遊氣
天陣清華野昇暄光西夜馳恩溢東瀉揮袂
靜崑炎開關納流赭錦輶凌石地華纓羈大
夏清臺映羅葉玄泚控瑤池馭鹿輸珍貺樹
羽饗來儀輟餽觀化宇栖籞萃條支薰風交
闐闐就日泛濛漪充庭延飲至絢簡敷春藻
迎姜已創圖命力方論道昔託遊河再備
商山皓欣逢德化流思效登封草

奉和宴中山應制

飛雲旋碧海解網宥青丘養
停八駿觀風駐五牛張樂臨堯野揚麾歷舜州中山獻仙
醑趙媛發清謳塞門朱鴈入郊數紫麟游一
舉氛霓靜千齡德化流

奉和春日望海

韓夷憊奉齎憑險亂天常乃神弘廟略橫海
剪吞航雷野清玄莢騰笳振白狼連雲飛巨
艦編石架浮梁周遊臨大壑降望極遐荒桃

門通山抃蓬渚降霓裳驚濤含蜃闕駭浪掩
晨光青丘絢青組丹谷耀華桑長驅七萃卒
成功百戰場俄且旋戎路飲至肅巖廊

奉和入潼關

曦馭循黃道星陳引翠旗濟潼紆萬乘臨河
耀六師前旌彌陸海後騎發通伊勢踰迴地
軸威盛轉天機是節歲窮紀關樹蕩涼颶仙
霧含靈掌瑞鼎照川湄冲襟賞臨睨高詠入
京畿

奉和元日應制

天正開初節日觀上重輪百靈滋景祚禹土
慶惟新待旦敷玄造韜旒御紫宸武帳臨光
宅文衛象鈞陳廣廷揚九奏大帛麗三辰發
生同化育播物體陶鈞霜空澄曉氣霞景瑩
芳春德暉覃率土相賀奉還淳

奉和秋日即日應制

玉露交珠網金風度綺錢昆明秋景淡岐岫
落霞然辭鷺歸寒海來鴻出遠天葉動羅帷

颺花晚繡衣鮮規空昇闈魄籠野散輕煙鵲
度林先起見沒水文圓無機絡秋緯如管奏
寒蟬乃睠情何極宸襟豫有旗

奉和秋暮言志應制

秋深桂初發寒摠菊餘菲波擁群鳥至秋飄
朔鴈歸月莢生還落雲枝似復非凝宸閱袖
畝觀文佇少微聖敬韜前哲先天諒不違

奉和喜雪應制

嶰州表竒 闕竹應遐巡何如御京洛流霰

下天津忽若瓊林曙俄同李徑春姑峯映仙
質郢路雜歌塵伏檻觀花瑞稱觴慶冬積飄
河共瀉銀委樹還重壁連山分掩翠綿霄遠
韜碧千里遍浮空五軻咸淪跡機前暉裂素
池上伴凌波騰華承玉宇凝照混金娥是日
松筠性欣奉栢梁歌

奉和過舊宅應制

飛雲臨紫極出震表青光自爾家寰海今茲
反帝鄉情深感伐國樂甚燕譙方白水浮佳
氣黃星聚太常參鳳鳴層閣艷雀賀雕梁桂
山猶總翠蘅薄尚流芳攀鱗有遺皓沐德抃
稱觴

奉和儀鸞殿早秋應制

睿想追嘉豫臨軒御早秋斜暉麗粉壁清吹
肅朱樓高殿凝陰滿雕窓艷曲流小臣參廣
宴大造諒難酬

奉和初春登樓即日應詔

旭旦臨重壁天眷極中京春暉發芳甸佳氣

滿層城去鳥隨看沒來雲逐望生歌裏霏煙
颺琴上凱風清文波浮鏤檻摘景煥雕楹璇
璣體寬政隆揀象端衡文規雖有作凝拱遂
無營沐恩空改鬢將何謝夏成

奉和登陝州城應制

挹河激綠宇御溝 朱宮辰旂翻麗景星蓋
曳雕虹學頻齊柳嫩妍笑發春藂錦鱗文碧
浪繡羽絢青空眷念三階靜遐想二南風

奉和過慈恩寺應制

鳳闕鄰金地龍旂拂寶臺雲楣將葉並風牖
送花來月宮清晚桂虹梁絢早梅梵境留宸
矚揆發麗天才

奉和行經破薛舉戰地應制

混元分大象長策挫修鯨於斯建宸極由此
創鴻名一戎乾宇泰千祀德 流垂衣凝庶
績端拱鑄群生復整瑤池駕還臨官渡營周
游尋曩迹曠望動天情離宮面丹浦帳殿矚
宛城虜場棲九穗前歌被六英戡地甘泉涌

陣處景雲生普天沾凱澤相携欣頌平

奉和詠雨應詔

舞商初赴節湘鷺遠迎秋飄絲交殿網亂滴
起池漚激霧分龍闕斜飛灑鳳樓崇朝方浹
寓宸盼俯凝旒

賦得歸

倦遊嗟落拓短翮慕追飛周醪忽同醉牙絃
乃共揮油雲澹寒色落景靄霜霏累日方投
分茲夕諒無歸

游清都觀尋沈道士

幽人蹈箕穎方士訪蓬瀛豈若逢真氣齊契
無體名旣詮衆理聊暢遠遊情縱心馳貝
闕怡神想玉京或命餘杭酒時聽洛濱笙風
衢通閭苑星使下層城蕙悵晨飈動芝房夕
露清方叶棲遲趣於此聽鐘聲

九日至微山亭

心逐南雲逝形隨北鴈來故鄉籬下菊今日
幾花開

送劉散賦得山樹鬱蒼蒼

喬木託危岫積翠統連岡
葉踈猶漏影花少未流芳
風來聞蕭蕭霧罷見蒼蒼
此中餞行邁不異上河梁

奉和聖製送來濟應詔七言

萬乘騰鑣警岐路百壺供帳餞離宮
御溝分水聲難絕廣宴當歌曲易終
興言共傷千里道俯迹聊示五情同
良哉既深留帝念沃化方有贊天聰

許敬宗集終

